

乾隆杭州府志

杭州府志卷九十四

人物 八 文苑二

國朝

胡文蔚字豹生仁和人性嗜學雖嚴寒溽暑不輟明崇正九年舉于鄉善詩古文詞足跡遍天下遇山川名勝輒爲

題咏順治間授高州府推官

浙江通志

談遷始名以訓字孺木

南雷文案

字仲木一字海若海寧人畱

心史學考証累朝典籍博稽諸家撰述中年燬于火沈思

強記覆閱羣書訊故老墨枯筆禿晚歲成編

靜志居詩話

章士斐字淇上錢塘諸生一桂子九歲喪母又一年喪父

奉祖母徐繼母高僦市樓一椽以居稍長喜讀書家貧不
常得油會祖母喪輒就棺下燈而讀之嚴寒無被覆衰麻
卷縮戰慄聲與歌誦聲間出鄰人憐之餉以餅餌士斐進
奉母母不食佯曰已食矣還以飼孤士斐奮勵鑽研六經
及子史百家靡不淹貫年十九補諸生旋食餼錢塘知縣
顧咸建會課諸生手兩卷不能定甲乙臨川陳際泰來杭
出示之際泰曰某卷清廟明堂之音取科第如拾芥某卷
奇峭幽折殆昌黎所謂鑿空構立者吾斷爲古文作家然
鴻飛冥冥非網羅中物也咸建曰吾固取其必傳者遂拔
士斐爲首以姚元煥次之姚後成進士而士斐竟以明經

老爲詩淡泊明淨得陶徵士風味

錢塘縣志

陳祚明字引倩錢塘人潛夫弟博學善屬文貧遊京師乞文者口占授之語率奇麗填門迫促至廢寢食長髯如戟雙眸如巖下電所著詩二十卷詞一卷古文尤富

浙江通志

俞時篤字企延錢塘諸生少與章士斐砥礪爲古學同郡許光祚嚴調御皆工書時篤盡窮其妙請乞滿門至廢七箸老而貧頗資之間學畫遂與北苑南宮頡頏嘗自笑曰此中山水清絕僅供俞生饘粥耳詩亦婉麗有法度朱延煥增補武林舊事時篤與叅訂之列

錢塘縣志

陳之問字令升號簡齋海寧人好讀書自六經三史以下

八家之集唐宋之詩丹鉛殆徧高會廣坐有所徵引長篇
累牘應口吟誦以架上書覆之一字不錯于書畫古器賞
鑒精絕而青烏素問龜卜雜述皆能言其理

黃宗義
撰傳

朱嘉徵字岷左號止谿海寧人詩文卓絕一時中崇正壬
午鄉試

國初署會稽教諭謁選得敘州推官多惠政六年告休歸與張
次仲朱朝瑛朝夕談經蕭然物外著述百餘卷惟漢魏樂

府廣序行世

海寧
州志

嚴津字子問餘杭人勅子嚴氏爲文章淵藪津繼起領袖
時賢應拔貢巡撫霍達表爲督漕推官不就事親孝家中

落而甘旨不缺顏所居曰陶菴日哦詩以明意

浙江通志

丁澎字飛濤號藥園仁和人順治乙未進士官禮部郎中

典河南試罷歸不問戶外事而自娛于文工爲詩頓挫清

壯有沉鬱之思

浙江通志

年未壯時卽名播江左其後仲弟景

鴻季弟潑皆以詩名世目之曰三丁

林璠丁藥園外傳

沈蘭或字方稷仁和諸生蘭先之弟年十一作大樹賦見

賞于陳子龍蘭或深究易理與蘭先講學河渚弟子受業

者甚衆

仁和縣志

黃燦字維含錢塘人博通經史精研法度崇正末海內方

尙詞華燦獨推古文源流竝有規格弟煒字維韞至性過

人慷慨有經世志嘗論兵法屯田水利山川形勢務期可

見諸行事與兄較論古文時稱爲二黃

城北雜記

朱兆震字匏子仁和人幼好讀書處兄弟間友讓無間言性疎澹薄聲譽接人如在春風中而少所許可獨與嚴津及應爲謙相友善嘗擁臯比說經造就學者先名節而後

文藝門下多一時知名士

仁和縣志

吳山濤字岱觀錢塘人明崇正己卯舉人博通經史能文章尤工于詩善書法作畫妙盡神理令陝西成縣致仕歸老吳山種秫爲娛更浮家泛宅往來苕霅之間

吳塞翁傳當出

關日賦西塞詩三十首因自號塞翁

錢塘縣志

張標字嗣畱海寧人順治壬辰授許州知州標孝友力貧
丁父喪廬墓讀書凡天官地志禮樂兵刑河漕田賦無不
貫有字學三十卷付子美文正其訛佚以問世

海寧
州志

吳名溢字豎知號我匏錢塘諸生博極羣經尤邃于春秋
叅舊說斷以己意著麟經註解四十卷又慨三傳異同各
有是非作三傳折衷遭母喪廬墓于滿覺隴註喪禮若干
卷畢乃復窮思極慮補新憶舊閱五載而成書視前編更
簡嚴焉

趙嘉穢
撰傳

明季文體詭變尙諸子百家仙釋語錄聲

牙詰屈之文名溢乃沉酣六經蔚以實義

浙江
通志

吳萬濬字亦哲仁和副貢生著有浴象賦一首載入

國朝賦楷歸安沈涵嘆謂顏延之赭白馬賦不能專美于前有

東柯草堂集

武林耆舊續集

子應本字潢序爲諸生食貧嗜古中

年卽不踏省門工書以左筆擅長

仁和縣志

胡介字彥遠錢塘人幼穎異爲博士弟子不立壇坫抗意

而行居河渚蓬門蘿屋與其妻翁氏笑傲溪山間翁賢而

能詩夫婦倡和欣欣自得其詩文嘗屬陸嘉淑爲芟薙之

介死後且十年淮東黃之翰刊其集行世

錢塘縣志

沈峻曾字廩菴仁和人順治甲午副榜年未五十卽棄去

舉子業從事詩古文詞與徐介應搗謙魏世倣毛先舒丁

澎景鴻關鈴史大成陸堃相倡和

武林耆舊續集

卓天寅字火傳號亮菴仁和人風雅領袖詩宗盛唐不落
卑靡之習家有傳經堂月波樓杜若舟藏書數萬卷四方
士至皆館之讀書其中又喜二氏之學造清流寺于塘栖
里以供四方高僧建昇元觀于計籌山以容海內羽流著
述等身名滿天下中順治甲午副榜

塘栖志畧

張壇字步青仁和人順治庚子舉人倜儻負奇氣博聞強
記詩豪逸頓挫悲涼古詩法建安雜有阮謝之體歌行多

規撫少陵近體出入高岑王李

武林耆舊續集

陸嘉淑字冰修海寧人有辛齋遺稿崇情遠跡高酣長謠

文采風流溢于賓座

浙江通志

錢士璋字章玉少隨父任京師明習朝典負經濟才民苦
于徭役士璋建議爲條鞭法以均之著爲令在甬上值海
寇亂士璋出奇計定之舟山以安薄游天台因號赤霞山
人後歸西湖見石山壁立有篆刻赤霞字符其號遂築菟
裘終老焉善吟咏工草書尤精繪畫得宋元人筆意所著
有赤霞山莊集無疾而逝年八十有五

錢塘縣志

章日躋字式九號目湖錢塘人有曠懷日在山水間枯筇
野棹風雨不輟又時歷茗雪嚴陵之勝越江淮行齊魯之
鄉所交莫非勝流杭之有湖如人之有目日躋目若秋水
因名曰目湖詩人其詩清而遠肆而能節

敘倫堂詩序

徐元倬字爲章錢塘人童時負雋才諸舅氏張青林所時
高會大幔亭上張指亭爲題曰汝方業文選能對客賦之
否元倬援筆數千言舉座嗟賞張摘其中賓饌日月吐納
烟霞二語榜其楹十六餽郡庠爲人嚴氣正性不與時流
接與弟元彪鍵戶讀書以尊遺經砥俗學爲己任

錢塘縣志

范驤字文白海寧人性孝友才敏絕倫爲文尙經術放黜
百家人方之廣川董子書法鍾王同鄉先正吳本泰一見
稱異悉以書籍與之環堵蕭然日以經籍自娛著有十三

經評註百卷古韻通補十卷

浙江通志

陸堦字梯霞錢塘人兄圻弟墳並以文章領袖東南堦授

生徒四方從遊者甚衆巡撫張鵬翮葺書院于萬松嶺集
通省士子讀書其中奉堦爲師所著有白鳳堂集十卷子
三人豐兆爵正夫皆能世其學而豐尤著

錢塘縣志

陳廷會錢塘諸生教授里中所著書高華典則陸培猷難
以妻子屬廷會廷會遂教其子繁昭于河渚

浙江通志

朱大年字介眉仁和人幼從徐氏受學習嚴身之具不食
肉者數年復遠引鷺峯近從闕里發羅菴林藪之藏搜軋
川池館之蹟爲歌頌詩文以自鳴所寄同時朱式曾字子
循錢塘諸生從遊應搗謙之門才質高美讀其詩皆得春
風沂水童冠詠歸之意才名傾動西冷

坦菴詩稿序

吳種字岸青仁和人齒未壯隨從祖尙書與祚于福建軍中磨盾舉瓊筆不停思閩海平以功授泰安同移濟寧知州其詩取材富故多偉詞命格高故饒古意

朱彝尊漁山草堂集序

吳農祥字慶伯一字星叟錢塘諸生中允太冲子少異敏一覽成誦家有賜書鍵戶伏讀茹經涵史馳騁百家康熙

戊午以博學宏詞薦歸而著書自娛條貫五經尤精于易

與毛奇齡友善然質疑送難不肯苟同

浙江通志

子容字端公

八歲通五經釣索馬鄭諸家遇三代器物舉對如目前事

爲文屏去一切詩婉而多諷有秋吟集

錢塘縣志

王蔚章字豹采錢塘貢生深心大力沉浸濃郁原委漢魏

而采掇六朝其論詩軒元而輕宋謂宋人學杜與唐遠元人學杜與唐近其論易謂自魏伯陽以來丹家所傳皆大禹之學連山歸藏之理論禮宗鄭斥王謂康成猶丹霄威鳳肅乃土堀中微蟲論議非尋章摘句者比

清盤山人集序

吳振宗字興公錢塘人與弟亢宗字次公皆能詩振宗長于選體亢宗詩不多作每一落筆輒蒼涼頓挫如以金鐵作畫而風雨颯集于毫端也

毛先舒吳次公詩序

張右民字用霖錢塘人爲葛寅亮高弟明末刻登樓文選風行海內講學授徒負笈無遠近毛先舒以古文名家亦出其門康熙癸亥修浙江通志有東臯集

錢塘縣志

陸繁昭字拒石行人培子培殉節死繁昭甫十歲奉母陳晨昏色養暇則編摩經史爲詩文最工駢體有善卷堂集行世尤善談論長筵廣座中吐佳言如玉屑風流文采奕奕動人同學諸生先後掇高第去繁昭泊如也

錢塘縣志

丁文策字叔范號固菴少以讀書繼言爲嗜布衣奉母居河渚究古今醫書試輒應手愈兩應督撫之聘纂修通志府志制府開宴貢院酒半酣命更乞詩文策信筆酬答皆具奇致卒年八十一學者稱江樵先生

吳農祥就正稿

張丹初名綱孫字祖望錢塘布衣年三十二喪妻不再娶體羸善病講服氣導引之術晚年夢神人更名丹稱秦亭

山人西泠十子之一也

王嗣槐秦亭山人傳

丹論詩謂少陵七律能

用比興他人雖極工鍊不過賦爾其南北行旅諸篇尤爲

奇崛

靜志居詩話

弟賁字繡虎錢塘諸生爲詩渾樸自然五律

尤能深涉杜津有白雲集

陳撰序

陸埏字左城錢塘人運昌子爲文沉博絕麗類諸兄所梓

丹鳳堂集漢魏齊梁如金在冶別有稿數十卷名經世驪

珠蓋三通之支流也年四十四而卒人惜之

浙江通志

沈謙字去矜號東江仁和諸生篤學好爲詩古文坐卧南

樓二十年後復葺東江草堂著有東江集

應嗣寅撰沈東江傳

西陵

十子各以格調自高去矜兼采組六朝故特溫麗

靜志居詩話

毛先舒字稚黃一名騃字馳黃錢塘諸生六歲能辨四聲
八歲能詩十歲屬文十八著白榆堂集鏤之版陳子龍爲
紹興推官見而咨嗟赴省城特詣之先舒感其知己師事
焉劉宗周講學鼓山先舒執贄往問性命之學究宋儒語
取其有裨實行者題曰鍼心慎鈔時京師語曰浙中三毛
東南文豪蓋指先舒與奇齡際可也

毛奇齡
撰墓志

陸次雲字雲士錢塘人康熙己未以鴻博徵復報罷尋作
吏郊縣丁父憂去之日民走送累百里起復知江陰縣詩

極排異獨出新意

徐乾學撰
澄江集序

顧龍文字仲御錢塘人與其弟豹文屢試互冠軍世謂顧

氏二難

錢塘縣志

張芬字子漸仁和人博綜典故有質疑者應之如數家珍與江浩虞宗瑤鄭鉉輩爲讀書社其法約數人共讀一書數日務了一義最有條貫晚愛西溪之勝時握一卷吟哦其中立石拒門編荆爲戶不入城市兵後盡亡其書老年默記從空指點甲乙雖貧且病亦不廢也

浙江通志

姚廷益錢塘人幼喜讀書博學強識十四補諸生旋拔貢爲文章根本秦漢反剏以樸削僞以真嚴沆顧豹文深器重之康熙癸亥修通志皆先達紳士惟廷益與章藻功以年少與其中謁選授中書舍人

錢塘縣志

沈九如字宣子錢塘人性至孝事繼母尤謹爲文有根柢
晝夜矻矻垂老不休以明經爲江山訓導值閩亂髑髏滿
山當事檄九如往收戰骨乃喟然曰是非仁人之意乎僕
雖儒官何忍辭其難于是躬歷萬山自衢之九龍抵仙霞
嶺穿虎狼荆棘中拾殘骸瘞之爲大冢十有二處爲文以
祭之尋轉嘉興教諭督撫聞九如博學徵修浙江通志年
八十歲矣筆札犀利出腹笥而授之三句而畢病篤呼其
子宋曰吾有所語汝具紙筆記之問之已暝矣錢塘縣志
葉生字又生新安籍仁和諸生少孤貧好學入深山鍵戶
十年不出山中積雪生自炊糜粥讀書不輟爲文闕深俊

逸用明經薦爲温州訓導卒年六十九崇祀名宦

舊志

吳巖茂字念溪錢塘人家貧力學砥行尤工詩性好山水每出遊歸卽成帙從遊者日廣晚乃叅究伊洛之學盛暑

嚴寒不輟註西銘太極諸書爲士林傳誦

錢塘縣志

王之獻字伯徵富陽人家藏書卷甚富喜讀古史好詩賦

修富陽志十二卷

富陽縣志

李式玉字東珙錢塘人少穎異讀書過目成誦年十七補

郡庠諸生應鄉薦不利遂專力著述六籍而外九流諸子

旁逮外家雜說凡奇文古字罔不搜討故其文詳贍宏肆

能盡達其意所欲言尤善詩歌精音律

錢塘縣志

章勗字我朋昌化諸生家素貧躬折薪以供親膳暇則讀書詩詞騷賦矢口而成墨蹟亦爲時所重康熙辛亥修邑

志勗總其事

昌化縣志

徐逢吉字紫凝號紫珊錢塘諸生住清波門外晚年病足

杜門不出日耽吟咏蕭然自得

武林耆舊續集

馮景字山公一字少渠錢塘人國子生于學無所不窺年十七卽學爲古文涵濡沉浸而說經之文尤邃卒年六十

有四學者私諡文介先生

道古堂集

沈用濟字方舟原名漢錢塘國學生幼工吟咏毛先舒嘆爲後生領袖及壯偕徐逢吉馮景游嶺南與耆舊相倡和

詩益進

武林耆舊續集

龔翔麟字天台更字蘅圃仁和副貢官工部主事擢御史當官有幹實居臺中號敢言尤以文學名著田居詩稿出入六季三唐歸宿於眉山蘇氏自少卽與秀水朱彝尊李良年李符平湖沈日皀沈岸登齋稱號浙西六家

居易錄

徐汾字武令仁和人少善屬文作娛賓寶刀賦驚其座人著有京山文苑經史徵萬卷樓集行世

浙江通志

沈珩字昭子海寧人康熙甲辰會試第一未釋褐而歸十五年不仕至戊午以博學宏詞薦試入格授編修充纂修明史官乞假歸珩淡于榮利好古手不停披嘗輯十三經

文鈔凡所屬綴舊畬經訓無一游談不根語有耿岩集若

千卷行世

許汝霖撰
沈珩傳

陳奕禧字子文號香泉海寧人以貢生任安邑縣丞負詩

名工書法

山西名宦
由部郎分司

大通橋出知石阡府補南

安所至人皆乞其書爭相寶貴常倣文選體集歷代詩文

爲文海岸而行之

山西通志

所著有虞州集續集春靄堂集秋

雨齋集笑門集綠陰亭集凡若干卷

海寧
州志

查嗣韓字荊州海寧人家赤貧過時而學不知有司尺度

族叔繼佐獨嘆爲未易才補錢塘諸生旋入監十三年不

拆家信耳精誦習夜分欲睡輒舉火灼兩臂至無完膚康

熙丁卯以五經應順天鄉試故事士占一經自明代顏茂猷譚貞良以五經進士稱嗣韓突起間筵至乙酉遂設五經中額實自嗣韓發之戊辰舉進士一甲第二人授編修

海寧

州志

查昇字仲韋一字聲山海寧人康熙戊辰進士選庶吉士授編修直

內廷歷諭德侍讀晉少詹兼侍讀學士昇負詩文盛名尤工

書法片楮隻字人爭寶貴

浙江通志

朱里字商角號青萊錢塘人邃于史學自西漢太初元年迄南宋隆興二年凡一千五百九十九人各爲論斷名青

萊續史一十八卷書成而盲人以爲符左氏云

浙江通志

陸韜字子容一名自震錢塘人次雲之姪也少負異姿應

童子試以古文詩詞拔第一知縣廉其貧贈之金悉以買

書晝夜讀咯血不已又向友人借得二十一史力疾研尋

疾篤遂死著有瑞石山房稿

城北雜記

虞黃吳字景明一字景銘錢塘人仲高子十歲卽善屬文

薄柳州乞巧更作辭巧文識者知其遠到康熙丙午舉鄉

薦官臨安教諭詩雅裁秀色蔚然名家五言古體尤號獨

步比于毛先舒

十子詩選序

吳任臣字志伊初字征鳴閩之蒲田人從父至杭遂籍仁

和補諸生好奇讀書世故未之識也許多爲學使者黜之
陸行人培手其卷注釋通告士大夫學使者知之遽讀尋
繹曰信誤矣亟易之由是名噪康熙十三年應博學宏詞
科入翰林與修明史生平多所論著嘗取唐季諸霸國事
爲十國春秋凡若干卷又精樂律嘗于市上見編鐘一枚
曰此大呂鐘也後滌視歎識云古大呂之鐘

吳農祥
撰墓誌

徐林鴻字大文一字寶名錢塘諸生工辭翰上擬左氏下
類兩晉康熙戊午薦舉博學宏詞報罷病歸遂無意仕進
掃一室讀書其中作爲詩歌清新典麗所著有兩間草堂
詩文集四十卷尤篤友誼漢陽王世顯南昌王猷定客死

于杭林鴻視含歛送其旅櫬歸太倉王昊四明周容卒京

師皆爲治喪又收其遺稿歸付其家人高其誼

錢塘縣志

查慎行字悔餘號初白世居海寧袁化鎮康熙癸酉舉順

天鄉試以大學士李光地薦入直南書房癸未成進士選

庶吉士授編修供奉七年以疾告歸性穎異五歲能詩十

歲作武侯論同邑范驤稱爲曠世才旣長游黃宗羲之門

所學益進最深於經諸經中于易尤邃作玩詞集解又著

經史正譌諸書好蘇軾詩編年補注砭砭者三十年自哀

其所爲詩爲敬業堂集共一百五十卷

許汝霖撰序

悔餘學有

本根斷斷自愛

王士正撰詩序

陳熹字允文一字星垣贈奉直大夫賦姿穎悟嗜古書蒐
羅忘倦年十三游括蒼適學使者按部至試應之遂冠一
軍後以赴試不便援例入國子監時黃宗羲講學姚江宗
長之問延致家塾爲子姪師熹暨伯兄燾俱受業焉熹顧
不得志于有司年四十後謝去場屋卽社集講會亦以爲
無益身心居恒靜課惟奉慎獨之教期於躬行實踐詩文
皆取法昌黎有手輯昌黎詩集注定本與查慎行倡和頗
多敬業堂集中屢見之

海寧
州志

吳陳琰字寶崖錢塘人少負詩名爲毛奇齡朱彝尊所知
中年往來南北與王士正宋犖交善而犖尤有國士之目

聲名藉甚卒不得一第僅以修書議敘出宰在平未久挂
吏議歸後復以薦仍入書局遺集甚富生平與同里蘇輪
往來倡和稱莫逆友輪字子傳號月查諸生奇齡稱其詩
清雄博達語警而氣軼

武林耆
舊續集

洪昇字昉思號稗村錢塘國子生以詩有名京師尤工院
本宮商五音不差唇吻旗亭壁間時聞雙鬟謳誦之以故
兒童婦女莫不知有洪先生者顧性落拓脯修所入隨手
散去後至流寓困窮因歸溺于烏鎮王士正挽詩云菟裘
終未卜魚腹恨如何昇嘗欲卜居武康山中所著稗村集
有大歷間風格

城東
雜記

趙瑜字瑾叔錢塘諸生高才博學能

詩文尤長于詞曲與洪昇齊名

武林耆舊續集

章藻功字豈續錢塘人與兄戡功無功並承父士斐家學

以詩文擅名于時藻功尤工駢體康熙癸未進士入翰林

才五六月引疾歸奉母闔戶著述有集行世

許汝霖思綺堂集序

程光祿字奕先錢塘人天質高妙其古樂府及游仙詩殆

仙才也

武林耆舊續集

王暉初名槩字丹麓號木菴又號松溪仁和人年十三補

學官弟子天質茂美筆氣疎秀毛奇齡稱其詩自然溫厚

不徒以音節侑屈見長

武林耆舊續集

王丹林字赤扞錢塘人官中書舍人工詩善書名滿長安

雖短章醉墨盡頓題識落筆爲人傳誦以病假歸有野航

集

章撫功撰墓誌

孫承祖字述先號古鐵敦古絕俗初寓津門繼

遊閩海詩名噪于南北著有石蘭堂集

吳穎芳撰序

汪煜字寓昭號平齋自新安遷錢塘父賡順治辛丑進士

煜少好武挽強控馬膽力過人後折節讀書披摘無遺義

行文兀傲自成一家言尤工詩閒淡古雅康熙乙丑進士

知貴州鎮遠縣縣故古大田溪洞多苗民難治煜撫馭有

方興文勸義民帖然不爲患戊寅遷吏科給事煜初席豐

饒以銳志學業不問生產家遂中落及官黃門無儋石儲

死之日同官助殮焉

兩浙鹽法志

諸九鼎字駿男一名墨字鐵閣錢塘人弟匡鼎字虎男號
橘叟並有令聞時人方之機雲軾輒九鼎才鉅而學瞻貫
穿經史百家之言爲人英偉倜儻有不可一世之概著有
諸鐵閣集樂清集匡鼎著書滿家文與歐曾爭坐詩則王
李雁行毛先舒稱其華實兼擅

武林耆
舊續集

查嗣琛字德尹號查浦海寧人少受業于姚江黃宗羲講
明六經指歸及性命之學與中表兄朱彝尊切劘風雅益
耽吟咏未遇遊京師詩名與伯兄慎行相埒時稱二查兼
工書翰康熙庚辰進士歷官翰林院侍講晚以門房之累
坐謫遣卒于關西著有查浦詩鈔查浦輯聞南北史識小

錄音韻通考諸書弟謹解音律工飛白書康熙甲午舉人

任開化教諭

海寧州志

林璫字鹿菴錢塘諸生生平淡嗜欲寡交游年五十始刻

意作古文詩詞名著海內

武林耆舊續集

吳允嘉字志上又字石倉錢塘人性孝友雅好吟咏爲文原本六經旁通史漢而章法頓挫刻意規撫蘇歐于經世之學尤所殫心生平愛藏書丹鉛點勘晨書暝寫凡山經地志墓碣家乘下逮百家小說叢殘之書蒐討不遺餘力晚年嗜好尤篤有四古堂文鈔餽山詩集石倉存稿石倉牋奏藏于其家其他輯錄如武林耆舊集武林文獻志錢

塘志補皆足備藝林掌故焉

浙江通志

姚之駟字魯思錢塘人康熙辛丑進士改庶吉士遷御史爲諸生時著有類林新詠恭逢

聖祖仁皇帝南巡進呈蒙畱

乙覽梓以行世又有古今體詩鈔

雲夔齋詩話

成廷楫字桂舟號匏亭仁和人祖肇毅戶科給事中有直諫聲廷楫承世清白不異簞家子少善讀書工詩文性嗜酒康熙辛卯舉于鄉謁選得婁縣知縣將引

見時廷楫謂天威咫尺恐氣懾飲酒以壯之入對語多錯謬賴上仁明不之罪改淳安教諭至則以學詣督諸生旦夕講論不休

與其鄉方進士婺如友善婺如曰予觀詩人多矣無畱飲
無澀吟未有如匏亭者所著大秀山人集二十卷于詩五
律尤追唐賢

沈廷芳
撰集

陸進字盡思餘杭貢生温州府學訓導詩古風以漢魏爲
法近體以初盛唐爲宗尤特嚴于雅俗二字繼西冷十子
而起者未能或之先也

王嗣槐集
青閣集序

汪坤字大隅號舍亭仁和人康熙甲午舉人淹通六經屬
文立就辭義超卓弱冠聲藉甚所至傾其輩行遂爲諸生
祭酒雍正乙酉聘修浙江通志及寧波府志有兄乾事之
如父終其身不忍別財異居待從子如己子著述甚富子

浦美才早天

張煇撰傳

浦字蘅洲仁和諸生內行淳茂孝親友

弟研析經義不琢自雕卒年三十有三

杭世駿撰墓表

顧悅履字丹宸海寧人康熙甲戌進士及第授編修累官

內閣學士兼禮部侍郎丁酉出理清河既竣明年病卒悅

履工臨池充子史精華佩文韻府總裁將脫稿以憂去適

其子五達選庶吉士因奏請使踵其事一時榮之

浙江通志

吳儀一字璿符亦字抒見錢塘人所居名吳山草堂髫年

入太學名滿都下經史子集一覽成誦奉天府丞姜希轍

重其才延之幕中徧歷邊塞詩文益工尤長于詞陳檢討

維崧推其詞爲天下第一王士正亦推重之

武林耆舊續集

沈紹姬號香巖錢塘人年十二學爲詩經營慘淡或竟日
不食家人呼爲吟癡家本富後以家難頻仍僕僕吳楚間
晚寓袁江垂二十年僦居僧舍煨折足鐺鬻文自給性坦
率客有詣之者或蓬首徒跣自據上座談竟遽入卧內久
之亦不報以是延譽者少傳澤洪爲刻其寒石詩鈔十二

卷
武林耆
舊續集

吳焯字尺鳬號繡谷錢塘人九歲能詩常與毛奇齡朱彝
尊暨一時主客講學沈佳園奇齡詢格物同異時焯年最
少居下座大言曰本末物也知本卽物格矣因舉黎立武
管東溟羅近溪諸家指意竟相往復毛奇齡執手稱畏友

康熙乙酉

聖祖仁皇帝南巡召試賦詩稱

旨賜御箭命隨行值兄比部郎沒父年老遂請終養丁酉

翠華再幸焯奏歲華紀麗續編十卷聖因寺志四卷海潮集說三

卷皆宣付內閣焯藏書數萬卷手自點勘讀書務精小學

于六書至爲熟洽又以許氏說文所引經傳與經典釋文

不相應嘗與無錫朱襄析說文分編經傳以補釋文之未

備雍正己酉聘修浙江通志及西湖志著有葯園詩稿渚

陸鴻飛集玲瓏簾詞南宋雜事詩行世其餘撰著十餘種

藏于家

張增撰
行狀

子城字敦復號甌亭克承先志殫心羣籍

插架所未備者復爲搜求勤加校勘數十年丹黃不去手

城子爲金中麟均能文早卒

家傳

顧升字隅東號斗山別號石帆仁和人少習舉子業工書畫尤長于詩初折衷皮陸後乃絕似放翁著有菽旨堂文集四卷寫山樓題畫詩四卷分綠牕詞鈔二卷書法宗顏平原晚年得董華亭之神畫倣元四大家而尤喜畫松故又號髯松康熙乙酉

聖祖仁皇帝南巡以所作詩書畫進蒙

睿賞謂所進書畫爲松江派許入南書房因父母年老願終養遂放歸年六十三卒以孫震貴贈承德郎翰林院庶吉士孫

震字敬齋號葦田晚更號葦杭仁和諸生乾隆丁丑春

南巡召試舉人授內閣中書辛巳成進士改庶吉士終刑部員外郎性純孝鯁直無私曲公退之餘手不釋卷所著書數

十卷藏於家

家傳

朱樟字鹿田號灌畦錢塘人少從毛奇齡游康熙己卯舉于鄉尙丁年也官蜀時其于蜀江脈縷分緒皆以目驗知之而怪酈元水經注之不相應又怪酈元身未到江以南所注漸江條下苟出胸臆凡作駁議十數條及守澤州多善政尤以揚挖風雅爲急務元郝文忠公集歲久失傳樟得善本重鏤版以傳世罷官後南歸暇輒偕里中詩老陳

景鐘蘇雄振朱霖趙泰諸君杖策湖堤香林竹戶遊展殆

遍年八十卒

武林耆舊續集

陳邦彥字世南少孤世父元龍撫教之總角卽工楷法康熙癸未進士入館選侍直

內廷詩文皆典雅有度書法宗董文敏歷侍讀學士歸乾隆

初起原官仕至禮部侍郎

家傳

顧有年字鶴中錢塘人寄籍上虞常結廬梅家橋顏曰復堂集四方名流倡和其中爲一時盛舉弟永年字九恒號

桐村康熙戊午舉人亦工詩有聲于時

武林耆舊續集

沈元滄字麟徵號東隅仁和人康熙丁酉副榜性至孝善

屬文毛奇齡查昇交稱之入

武英殿校書聲譽藉甚議敘授文昌知縣子三廷懷心廷芳

俱能世其學以子廷芳貴贈通議大夫

武林耆舊續集

翁嵩年字康飴號蘿軒仁和人生而穎異年十三卽通六經大義長于百家之言靡不探測而尤精于左氏以文章名東南康熙戊辰成進士授戶部主事歷刑部郎中督學廣東矢心愼恪務得真才先是學使者以瓊州在海外檄生童附雷州考試嵩年曰吾豈以一人易千萬人命乎出入忠信何畏焉竟渡海後著爲令事竣歸里有別業在西湖退休其中以詩酒自娛

張廷玉撰墓誌

沈佳字昭嗣錢塘人兒時卽有志伊洛之學及長研窮性命多著述所居名學士園自少壯至通藉及歸養未嘗輟書康熙戊辰進士初知監利縣補安化卒于官

浙江通志

厲鶚字太鴻號樊榭錢塘人康熙庚子舉人少孤貧餓居杭城東園敝屋數椽讀書不輟聲雋一時乾隆丙辰應博學鴻詞科

廷試被放南歸奉老親與鄉閭諸老酬倡間客遊揚州有馬氏藏書最富延至其家遺文秘牒無所不窺故其發爲詩文削膚存液辭必已出以清和爲聲響以恬淡爲神味考據故實之作搜瑕抉隱仍寓正論于敘事中讀者咸歛手儀

服數十年大江南北所至多爭設壇坫皆奉爲盟主焉尤

工長短句入南宋諸家之勝

汪沆樊榭山房文集序

沈翼機字西園海寧人康熙丙戌進士選庶常分纂秘閣諸書多取折衷後進爭師之典試四川督學貴州江西乞

假旋里纂修浙江通志

海寧州志

徐繼樞字楚生號沙村杭郡諸生生平博學多聞于經義多所發明爲毛奇齡所賞歿後門弟子金虞何玉梁梁啟心等共謀剗削潛德幽光斷不湮沒失傳也

倪國璉沙村詩鈔跋

梁文濂字次周號谿父錢塘貢生諸暨訓導以子詩正貴累封光祿大夫屆古稀之歲膺上卿之封鄉里以達尊相

推重而文濂讀書樂道依然儒素春秋佳日于六橋三竺之間賦詩飲酒劇談往事洵此邦文獻也季子夢善折節讀書無貴介習氣乾隆癸酉舉人喜爲詩有午樓詩集

雲

齋詩話

弟文泓字秋潭號龍泓又號深甫以兄爲師終身執

弟子禮惟謹天性孤介寡交遊家貧布衣蔬食泊然自甘日以臨撫法帖背誦經書爲課晚歲詩古文益工書法益精到抄許氏說文數遍爲補注若干卷

家傳

倪國璉字子珍一字西崑仁和人雍正庚戌進士館選尋

遷吏科給事中恭敬謙和事親極孝文筆醇雅詩格清真

小楷遒勁

汪惟憲尊聞錄

子承寬字虞疆乾隆甲戌進士及第歷

倉場侍郎終太常卿亦以詩文書法著於時

公舉事實

金志章初名士奇字繪貞號江聲錢塘人雍正癸卯舉人
由中書遷侍讀出爲口北道清才淵雅性耽撰述官口北
時續兩鎮三關之志歸田後輯吳山志援引該博家人不
戒悉燬于火詩亦隨燼焉復從友朋處搜輯零星加以記
憶僅得江聲草堂詩集八卷

桂堂詩話

長子焜初名文濟字以

寧號赤泉雍正乙卯舉人官禮部司務有妙明書屋遺集
次子文煒字質夫號金門乾隆己未進士由翰林編修改
知府屢獲咎譴蒙

恩寬赦自塞上歸歿于問津書院生平著述甚富從子炫字聞

石諸生長於史學能詩好遠遊卒於塞上

公舉事實

嚴烺字曙升餘杭人曾采子淵源家學天稟絕人詩文皆

踔厲風發

吳華孫晚晴軒詩序

周霑字雨甘號西坪錢塘人于書無所不窺今古文兼諸

家所長詩宗盛唐別出機杼海寧陳元龍以侍讀承修康

熙字典延霑總理校刊事雍正庚戌一甲一名及第授修

撰典試湖南江南督學陝西公允有聲

周氏家狀

丁文衡字公銓號茜園仁和人博雅工詩古文撰著最多

家貧以布衣老毛奇齡嘗謂茜園胸有卷帙于載籍根柢

多所究竟故詩賦皆一往奮發有自得之致

汪惟憲尊聞錄

沈嘉轍字樂城號个庭仁和人詩清蒼沉鬱有南宋雜事詩偕吳焯陳芝光符曾趙昱厲鶚趙信各爲絕句百首梓

以行世

桂堂詩話

周京字少穆號穆門錢塘國子生考列州同事親至孝父病禱於神願減己壽益考翌日乃瘳延五載授經奉母甘旨年垂艾依依若孺子友愛弟視弟子女如己出中年南遊閩海北燕趙西秦晉所歷名山大川墟莽古跡悲歌慷慨書法奇逸酒酣興發數十紙立盡到處名卿倒屣虛席商畧封事不少阿晚息影蓬廬共里中詩老結吟社縱浪湖山醉題酒樓壁好事競鈔詩買酒有詩價如酒價高之

句勝事足艷千古卒年七十有三

桑調元撰墓誌

趙昱字功千一字谷林仁和人貢生與弟信同舉博學鴻詞報罷歸讀書自娛築春草園饒池館之勝擁異書近數萬卷藏書之所名小山堂先是昱遭父喪毀瘠幾不能起將母閒居循陔采菽補詩爲樂著有愛日堂集十六卷弟信字意林國子生與昱稱二林詩極秀婉生平工書善畫而不多作作則清氣樸眉宇著有秀硯齋稿若干卷醴略二卷

武林耆舊續集

昱子一清字誠夫號東潛國子生博極羣書

兼承庭訓著水經注釋四十卷注箋刊誤十二卷附錄二

卷大吏進其書于

四庫館其餘著述甚富從子賜珍原名珍字天庚號春帆副貢生充

內廷教習工篆籀行楷與校西清古鑑年五十二卒于京師

有春帆吟稿

公舉事實

杭世駿字大宗號堇浦仁和人少蘊清才博遊宏覽于學無所不貫所藏書擁榻積几不下千萬卷枕籍其中目睇手纂幾忘晷夕故其氣華其節亮其辭宏肆而奧博一時羣雄莫與抗者中雍正甲辰鄉試乾隆初舉博學宏詞科授翰林散直之暇復肆志併力于文章落職歸杜門奉母暇則偕里中耆舊襟契及方外之侶結南屏詩社歌咏太

平著述甚富

汪沆道古堂集序

符曾字幼魯號藥林錢塘國子生博學嗜古詩文爲時所

重以薦授主事轉員外郎

武林耆舊續集

曾詩用思清以深隸事

雅而韻出入於漁洋竹垞兩家之間

鄭江春鳧小稿序

陳章字授衣號竹町錢塘人古心而篤行方嚴醇雅造次

不苟有儒者氣象故其爲詩亦絕無險詖之習夸誕靡曼

之音狹隘僻陋之容破碎之句而一出之以和平溫厚取

材自漢魏以至宋元無不到而歸宿于中唐諸公

全祖望孟晉齋

集序弟臯字江臯號對鷗亦工詩詞與章同客廣陵時大江

南北開設壇坫爭以得臯兄弟爲勝紅橋白塔皆其擘牋

浣筆地也著有吾盡吾意齋詩集對鷗閣漫語

武林耆舊續集

金農字壽門錢塘人與石文丁敬陳章同住江干此倡彼和爭相淬厲文之詩清章之詩純敬之詩健而農之詩新各自名家甬上全祖望謂其餐霞吸露不食人間烟火者少工八分法鄭谷口而小變其體著有冬心先生集冬心續集三體詩畫竹記

雲螭齋詩話

農年五十餘始從事于畫涉

筆卽古脫盡畫家之習

畫徵錄

石文字行之號貞石有才早

世詩神致俊爽酷似徐昌穀而天不永年古今一也

貞石遺集

序

汪惟憲字子宜一字積山仁和人諸生試輒冠儕偶名聲

噪甚而奉已守約動法古人不與世苟立異同生平于書

無所不讀爲文直造古作者

胡號撰汪積山傳

趙大鯨字橫山仁和人雍正甲辰進士由庶常官至副都御史初官翰林時

御試列高等遂邀不次之擢詞館六年一試自此始也以終養

乞歸掌教敷文書院汲引後學孜孜不倦浙省知名之士

皆出其門子升庚辰進士改庶吉士亦有文名

學齋家傳

周玉章字叔大號葯欄仁和家人家貧力學淹貫經史事後母極孝文行爲一時稱重乾隆丙辰薦博學鴻詞是科中順天鄉試明年入翰林與修一統志授編修官至侍讀學

士充講官前後八年在

上書房行走年七十卒

周氏家狀

盧存心字敬甫初名崑字玉巖先世自餘姚遷于杭與同里桑調元以道義相切劘家貧而氣節益厲詩不一格或澄淡似陶或奇倔似韓或豪騁似蘇或深秀似王孟桑調元賦鎮海樓長律二百韻存心卽賦浙江潮長律二百韻以配之乾隆丙辰薦博學鴻詞試罷卽歸旋以恩貢入太學以子文昭貴贈翰林

述行

陳兆崙字星齋號句山錢塘人幼穎異耽吟咏與一時名宿梁啓心汪維憲孫灝任應烈嚴在昌諸人切劘復肆力

于秦漢以下諸家著述爲文直臻上乘世所傳句山一刻
桐城方苞稱爲根源盛大望之有深山大澤龍虎變化氣
象中雍正甲辰鄉試庚戌成進士是科進士分省學習試
用派往福建大吏素聞文名卽令攝鰲峯書院講席總領
志局多所補輯乙卯考授內閣中書丙辰

召試博學鴻詞授翰林充講官纂修會典及明史綱目後爲續
文獻通考副總裁累官順天府尹通政副使太僕寺卿入
直

上書房乞假葬親躬裹營築廬于墓次假期屆滿仍在
上書房行走

恩准食俸以資贍給每下直則擁爐室中手自訂正生平著述
卒年七十有二兆崙于學以心得爲主研究諸經折衷衆
說二十二史丹黃並下加以論斷靡不挈其要領詩古今
諸體追踪漢魏盛唐晚乃出入坡谷凡所著述士林咸奉

爲圭臬云

述行

查祥字星南號穀齋海寧人三歲喪母哭仆地人異之讀
書不務章句二十遊京師詩文詞翰傾動一時康熙戊戌
成進士入詞館充政治典訓編纂官雍正元年充實錄館
纂修官尋罷歸乾隆元年大學士徐本薦舉博學鴻詞抵
京已逾試期充律例館纂修慨然曰讀書一生未嘗有所

施用此書出天下遵守一不慎害無窮矣有未愜于中輒
不成寐忽有得中夜促舉火筆之書踰年以才識明練辨
事精詳奏改提調官全書專委督焉遇應增損敘述顛末
以取進止無不報可始終七年律例成議敘給還七品京
銜既歸歷主敷文安定書院講席纂修兩浙鹽法志海塘
志兩淮鹽法志暮年里居輯邑中近事爲縣志補書法逼
董文敏所著雲在詩鈔九卷已梓行

海寧
州志

梁啟心字首存號設林仁和人幼警敏讀書過目能彊記
號爲奇童初瀕江岸以居老屋數椽與弟詩正自相師友
詩文意境澄復鬱遠不染纖埃而又如越人之醫能隨俗

爲變乾隆己未成進士改庶常時父已屆暮齒遂引疾歸
垂二十年不出

上憐其孝卽授職編修故事所未有也

墓誌

王延年字介眉錢塘人雍正丙午舉人國子監助教以薦
舉經學改官司業時年已七十餘當世榮之有續綱鑑紀
事本末及湧輪居文集行世

公舉事實

張增字曦亮號南漪仁和人乾隆丁卯舉人雅才淵思于
書無所不窺搜瑕剔隱于史學尤爲專長其爲文少效晚
唐人清澀之體旣乃出入八家得其恣肆奧衍以暢其氣
晚年吐棄浮艷壹意治經

聖天子方求碩學之士公卿交上其名徵詣京師四方待

詔者遲久未集而增以故人之招南回甫抵家病卒

杭世駿南
澹遺集序

王曾祥字麟徵號茨檐仁和人家極貧著有靜便齋詩文

集若干卷行世事親至孝于書無所不讀肆力詩古文詞

深入古人之室書法顏歐手自鈔錄一筆不苟爲諸生僅

三試鎖院輒棄去雷學使鉉聞其名重之強召之見始一

謁鉉作二王生傳以曾祥爲杭郡第一其一則揚州王世

球也

城北
雜記

曾祥辭雷學使舉優行書有云學無窮期品難

預定可以知其品概矣

雲夔齋
詩話

丁敬字敬身住家江干少不習舉子業年甫冠始折節讀

書爲詩造語奇崛有龍泓館集

雲壑齋詩話

又稱龍泓山人釀

麴葉自給身厠傭販未嘗自異顧好金石文字窮巖絕壁

手自摹搨證以志傳著武林金石錄分隸皆入古而于篆

尤篤善摹印然非性命之契不能得其一字

道古室集

子健字

誠叔未弱冠卽能詩未躋中壽而卒遺集傳世佺字松老

嘗補注爾雅兼長於詩工漢隸能世其學

公舉事實

施廷樞字北亭號慎甫錢塘國學生嗜讀書博覽羣籍于

經史傳注字句疑似者每抉摘謬誤而舉正之著有十駕

集

汪沆施廷樞傳

葉溶字容水一字鶴塗錢塘諸生以古文名于世更精史

事結廬米山巔多植梅竹藏書千帙自二十一史外凡百
家子集叢脞人不勝讀者皆分辨條晰取以自烹晚年益
徜徉山水間間出所作人謂震川遵嚴不過焉家傳

汪兆舒字果齋休寧人徙居杭州研精經術學有本源於
書無所不窺汪由敦師事之著有穀玉類編汪沆撰敘

徐夢元字端木號徐村錢塘諸生幼通敏若有夙悟及長
好爲詩歌宗唐之香山間亦出入宋元吳穎芳撰傳

沈甲字眷瑤一字桐扣仁和諸生品學深純長于書畫貧
居委巷中四方賢豪遇者咸起式廬之敬困蹟諸生曾無

怨尤賦詩作文不暫輟汪惟憲尊聞錄

汪師韓字韓門號上湖錢塘人雍正癸丑成進士翰林編修乾隆改元師韓方以才名經掌院大學士奏直起居注記註之有協修從師韓始入直數月聞母病乞假歸丁憂服闋起復而離館閣者且十年矣尙書張照爲

武英殿總裁疏薦校勘經史師韓承

詔任事未嘗一詣照第旋督學湖南降調復入都大學士公傳恒薦入

上書房由謫居復任館職故事保舉者稱舉主事以師禮師韓曰古人譏拜爵公朝而謝恩私門公賢者我何得循俗例以薄待公也落職後客遊畿輔制府方觀承延主會城

蓮花池講席會奉

旨核天下書院院長觀承因以入奏

上猶記憶以好學問稱之師韓聞而感涕作詩四章記其事其
有關出處進退之大端在他人所不能爲而確然行之無

疑者類如此師韓少以文名四方中年以後一意窮經諸

經皆有著述於易尤邃而賦詩爲最工

孫顯撰
贈序

曹芝字莖

九號荔帷仁和貢生爲韓門高第學有根底與里中諸老

相倡和分茅設範無所比附

吳城綺石
齋集序

施安字竹田號石友仁和人甫踰冠詩格已成詩人吳焯

嘗嘆後來之秀當以竹田爲首所著有舊雨齋集子學韓

字禮齋號石泉仁和諸生善讀父書於詞賦雜文無所不

工屢踏省門輒報罷竟以此而夭惜哉

武林耆舊續集

戴廷燊字綸掌淵珠晚所自號也少爲吏茶陵彭維新領浙藩獨以文藝見知工詩與楊知丁敬金左張暘倡酬于城南登六和塔賦百韻筆不停綴名章秀句冠壓儕偶著

有聽鵬亭詩集

杭世駿撰墓碣

楊知字誨仲錢塘諸生受業於何焯好李光地說經諸書能闡揚其說息影窮廬踵決肘見而恪守師訓力學罔倦其詩清和醇雅得唐人秘鑰有審是齋詩鈔行世

鄭江撰序

吳頴芳字西林仁和人住艮山門外臨江鄉亦號臨江鄉

人少讀書不樂爲舉子業究心律呂之學著有吹豳錄若干卷又于字學諸書考證精確成說文理董若干卷世共賞之中年逃于禪凡湖山縑廬幽邃之區每過輒流連竟宿繙誦內典諸經冰牀雪被經旬忘返所作詩文脫離塵埽卒年八十同里徐堂字紀南號秋竹工詩刊有藉谿古堂詩一卷與穎芳倡和爲多穎芳推爲畏友云

汪沆撰傳

汪沆字西顥號槐塘錢塘諸生早歲能詩爲學博涉無津涯與王曾祥杭世駿符之恒張燴稱松里五子分修浙江通志及西湖志舉博學鴻詞

廷試額溢報罷遊天津客查氏水西莊南北論詩者奉爲壇坫

大學士史貽直欲薦舉經學以母老辭歸沆好求有用之學自農田水利邊防軍政古今沿革方俗利病所在靡不條貫屢爲大府所招致遇事直言見者感其誠晚年自定撰著多通達治體鑒然可見施行者性肫篤事親至孝昆弟友愛未嘗析箸姊寡迎養之終身惠周戚黨前後葬三十餘棺喜引翼後進士論歸之在五子中最爲老壽年八十一卒族子得稻字步山一字少白乾隆丙子科舉人性伉直見義必爲積學能文究心性理所著靜觀圖說學者稱之書法入二王之室

邵晉涵撰傳

張世犛字寓椿號無夜生時母夢大士授青蓮自號夢蓮

生乾隆甲子領鄉薦第一工詩多做法唐人以切題爲尙
書法東坡性落落寡合然與人無機心晚年學佛怛化于
潮鳴寺其同年友汪憲醵資葬之

武林書
舊續集

柳溥字德洋號潔夫錢塘人乾隆辛酉副榜講學雲居山
中四方生徒聞風受業甚衆暇卽棹湖噓吹風烟于秀巖
澄波間歌詩以寫發之未嘗一日不自樂也

吳穎芳
撰傳

孫珠字龍光號柳樊錢塘人稟質孱弱而意氣銳厲嗜讀
書襍被入空山蕭寺中掃一室皮書數千卷坐牀穿穴珠
甫生而失母生之日卽母忌辰每逢是日必縞衣蔬食涕
淚終日事父及繼母色養甚備舉乾隆丁卯鄉試家居立

古香會課爲諸子指授文律遠近請業者不絕

翟灝無不宜齋集

吳鴻字頡雲號雲巖仁和人乾隆丁卯鄉試第一辛未

殿試復第一士無遠近無有不誦其文者授修撰充講官進御之文典則醇雅好獎掖後進典廣東湖南學政文風丕振年未四十一夕而卒官至翰林侍讀鴻端謹和易風度凝然前輩多期以公輔未竟其用朝野惜之

家傳

周天度字讓谷號西隲仁和人年十六始讀四子書畢父經邦住唐棲鎮遠館歸絕不一問里中人有中也養不中之謂天度聞而耻之決意入會城受業陳兆崙之門犍戶攻苦夜分不休經史子集靡不窮究甫三年而學大成矣

乾隆庚午舉鄉試第一壬申成進士文名噪于京師詩賦
文詞四方傳誦初宰饒陽調清苑陞主事出守許州所至
輒有循聲公舉事實其詩充蔚豪健跌蕩可喜雅不欲多存其
存者皆卓乎可傳者也張增十誦齋集序

陸飛字起潛號筱飲仁和人瀚之孫也乾隆乙酉舉鄉試
第一少負才名所爲詩大約古體朗拔而蔚茂近體鮮潔
而渾成不屑屑規倣前賢而自蟬蛻於俗成一家之言至
于維風勵俗尤憂深思遠情現乎辭著有筱飲齋集讀易
象臆梓行于世汪師韓筱飲齋集序高繩武字啟新號蘭陔仁和廩
貢生植品高潔少工制藝試輒冠軍中年與王曾祥陸飛

遊始爲詩人比之高達夫著有蘭陔詩稿

武林耆舊續集

王德溥

字容大號澹和仁和貢生有養素園詩集

武林耆舊續集

德溥先

世本有藏書復力爲搜羅壓架萬卷丹鉛皆滿以植學勤

精于詩五言宗陶謝近體出入唐宋名家

汪沆撰傳

朱楓字近漪號排山仁和人性高潔不妄與人交獨與桑

調元丁敬相契工詩文中歲遊陝西河南搜訪金石文字

窮崖荒店徘徊竟日古文奇字應口成誦證明史書多前

人所未及又得秦漢古瓦及古泉刀列爲圖辨正其同異

晚歲詩益澄澹與山人童鉦唱酬靡間

二樹遺集

嚴誠字力闇號鐵橋仁和人毛髭就學手不釋卷乾隆己

已列府庠六書諧聲洞悉源流篆楷則遠宗漢魏晉藻繪
則近法倪黃詠歌所出一本性靈賦稟直方與人和易臨
事則守正不阿乙酉登鄉薦歿年三十有六兄果爲編定
遺集果字敏中庚寅舉人亦以文學著聲嚴際昌
撰傳同時陳
寅字劭之體羸善病嗜訓詁音韻之學爲錢塘諸生絕意
仕進見人終日論經史無一俗語著小學書數種兼善六

朝駢體文

余大觀
撰傳

金肇鑾字羽階號存齋錢塘貢生少從厲鶚遊學爲詩有
經世之才局於牖下不得展其用悲愉歎戚一寓之於詞
咏不妄示人得見者族叔志章王曾祥汪沆施廷樞數子

而已

杭世駿金存齋遺集序

從子澧字有蘭錢塘縣學生以孝行著

稱所爲詩文雅健宏深力祛纖浮之習有華萼堂遺稿若

干卷

汪沆撰傳

陳璵字煥若號覆崖海寧人乾隆甲子領鄉薦官國子監學錄以子用敷貴贈通奉大夫生平爲文以清真簡老闡發聖賢精義爲主嘗品評晉唐宋元明法帖倣唐詩品彙式曰正統曰絕軌曰會通曰拾遺曰資獻分爲五部論者謂其鑒別精審在渤海藏真玉烟堂諸帖之上有如無室

詩草藏家

行述

杭州府志卷九十四終